

樂陵縣鄉土志

宣統元年己酉七月

樂陵縣鄉土志

東安徐壽彭續脩

濟南國家  
報館印

樂陵縣鄉土志序

志者古史之流也自王迹熄而省方問俗之典廢所恃以周知方隅者惟列國紀事之書如今之通志近是秦漢以來變封建為郡縣而紀載紛如故雖蕞爾小邑皆有志乘以備採擇蓋藉以察盛衰升降之由而有裨於治理也方今

聖天子振興學校命各州縣設立學堂學務處奏定章程即令各州縣編輯鄉土志為教授蒙學課本將以造就人才雖用意與縣志不同而考文徵獻則一也樂陵為無棣名區舊列藩封世生賢哲風俗純厚物產豐饒忠孝節義代不乏人士農工商各安實業舉凡山川道路井里桑麻以及飛潛動植之生生不已者均堪載諸簡編用資觀感

樂陵縣鄉土志序

一

近者學術日新識時務者又皆爭自砥礪趨塵恐後則鄉土志一書烏可以不輯無如一二年中前任皆因在官未久先後交卸是以遲之又久以迄於今江文通云作史莫先於志彭接篆以後即延邑之博學能文者二三人總其事詢諸耆老徵諸載籍按目考查依例編撰簿書之暇又與諸紳參互考證實者錄之偽者刪之可傳者紀之可疑者闕之有豔稱當世為眾口所交推者則斟酌其是非而增入之事必求其切要詞必期於簡雅雖不敢曰美備而文而大略亦庶幾無憾焉凡兩閱月始歲事俟呈學部審定後再刊發各蒙學堂以為課本俾生斯鄉者擴其識淪其智愛鄉土即以愛

國家而尊君親上之忱自有不期然而然者矧志之詳者治自備即官

斯土者於案牘而外亦得以時時察其風土人情考其政治之得失則鄉土志之作固普通學之基礎亦治斯民者之史乘也 彭於是深幸是書之有關於治道也遂首先捐廉付諸剞劂而諸紳亦樂為資助焉是為序

光緒三十有四年夏五月知樂陵縣事東安徐壽彭

前任鉅清教諭乙酉舉人李毓珂

編輯

候選復設教諭丁酉拔貢鄭秉鈺

五品銜候選訓導丁酉舉人王承謙

鴻臚寺序班廩生王承誥

全校正

候選訓導廩生張彝式

歲貢生候選府經歷史延宗

表

樂陵縣鄉土志目錄

卷之一

歷史

本境建置

卷之二

政績錄

兵事錄

卷之三

耆舊錄

附名宦祠

鄉賢祠

忠義節烈祠

樂陵縣鄉土志目錄

一

卷之四

人類

戶口

氏族

宗教

實業

卷之五

地理

山水

道路



卷之六

物產  
商務

樂陵縣鄉土志目錄

二

樂陵縣鄉土志卷之一

歷史一 歷代沿革

樂陵自西漢始置為縣東漢建安中改治為郡魏因之晉置為國懷愍時石勒襲邵續於樂陵即此南北朝俱沿為郡隋唐而後歷宋金元明俱置為縣其間或隸滄州或隸棣州隨世運為沿革也

國朝雍正間升武定州為府而樂陵縣屬焉樂陵北通天津為畿輔之門戶南達濟南實省垣之後勁四鎮控其外三河當其衝厭次富平名稱不一千童重合蹟址猶存生長於斯者士食舊德農服先疇工制器商通財莫不各有專業爭自磨礪其他若

漢堞秋蓬元臺春草名勝諸區足供遊覽者猶天時人事變遷之未馬耳

歷史二 歷代人物

樂陵前輩磊磊落落於天壤間者代不乏人春秋戰國時世遠難稽矣由漢歷明以迄我

朝指董偃之佞者有人死苻堅之難者有人或以嚴憚稱或以循良著或處安史之亂勤王及於河池或儕韓張之列督師次於臨平或定太常之禮或擊魏閹之奸俱卓然有聲詳載於前史者也厥後名賢輩出爭自樹立或出仕而得去思碑或衡文而負人倫鑒或見重於儒林或蜚聲於文苑皆嘖嘖焉膾炙於人口

至若武功義舉忠孝廉節足以動後人之觀感為時賢所欽佩者更指不勝屈以此見

聖天子文化之隆抑亦賢牧令化導之德歟

本境建置之始末

按漢景帝廢濟南國為濟南郡以餘地置平原郡統樂陵等縣厥後地節中封史高為樂陵侯建武時封邳湯為樂陵侯則樂陵自西漢以來相沿已久矣

未置本境以前

唐虞夏商隸兗州或曰青州

周為無棣地屬齊國

春秋戰國屬齊國

秦為厭次縣屬齊郡

漢改置厭次為富平東漢永平中又改富平為厭次

既置本境以後

漢始置樂陵縣屬平原郡並置渤海郡轄重合千童陽信等縣嗣後重合千童並省入樂陵

明洪武時境內有重合千童二鄉

東漢建安中置樂陵郡以縣屬之

魏為樂陵郡隸冀州

晉為樂陵國隸冀州徙刺史治於厭次

南宋為樂陵郡隸冀州南燕滅地入於魏

北魏為樂陵郡領縣五隸青州熙平二年隸滄州

北齊為樂陵郡領樂陵縣

隋為樂陵縣屬渤海郡隸兗州又析為鬲津縣後省

唐為樂陵縣屬滄州景城郡隸河北道武德四年置棣州八年州廢縣屬滄州太和二年仍屬棣州尋復屬滄州

五代為樂陵縣屬滄州隸河北道

宋為樂陵縣屬滄州隸河北東路熙寧二年徙治咸平鎮即舊樂陵

金為樂陵縣屬滄州隸河北東路

元為樂陵縣屬滄州隸河間路


明為樂陵縣徙治富平鎮屬濟南府棣州改樂安州尋改武定

州隸山東布政使司

國朝為樂陵縣屬武定府隸山東布政使司

按樂陵自置縣以來或隸平原郡或隸渤海郡附屬靡常矣東漢建安中置樂陵郡以縣屬之晉移郡於厭次為樂陵國南宋改國為郡地後入於魏魏於縣置義興郡太和中罷之仍移樂陵郡來治省重合入樂陵縣隋廢樂陵郡以縣屬渤海郡開皇十六年析置鬲津縣大業初省入唐初以縣屬棣州後屬滄州武德四年析饒安即千地置鬲津縣貞觀元年省入宋熙寧中徙治咸平鎮明洪武二年徙治富平鎮即今縣治也七月改屬棣州永樂元年以避成祖諱改棣州為樂安州宣德元年平高

煦改為武定州縣均屬焉  
國朝雍正二年陞武定為直隸州十二年陞為府縣仍屬之此樂  
陵縣沿革之大概也



樂陵縣鄉土志卷之二

政績錄

親民之官自古為重昔何最不願為臺閣願為劇縣以其惠易及民耳邑自東漢迄六朝皆郡治其間賢太守概不乏人若西晉之邵續北齊之房公其顯著者也隋唐而降湮沒不傳至有明紀載較詳茲就舊志所已載與所未載者採錄其事蹟紀之於篇俾後之來者觀感焉志政績

漢

龔遂山陽人宣帝時為渤海太守時邑屬渤海郡

事詳漢書本傳

周磐字堅伯汝南安城人少遊京師學古文尚書洪範五行左氏傳

樂陵縣鄉土志卷之二

五

好禮有行非典謨不言諸儒宗之和帝初拜謁者除任城長遷陽夏重合令今邑內有遺蹟皆有惠政建元元年七十三歲夢先師東里先生與己講於陰堂之奧遂無病而終右採錄後漢書

魏

陳矯字季弼廣陵東陽人魏武時辟為樂陵太守文帝嘗稱之曰陳季弼臨大節明略過人信一時之俊傑也

韓暨字公至南陽人避亂魯陽山魏武辟為丞相曹屬後遷樂陵太守徙監冶謁者所至皆稱職年踰八十進爵為司徒史稱之曰處以靜居行化出以任職流稱以上二人採錄三國志

晉

邵續字嗣祖魏郡安陽人樸素有烈志懷愍時王浚領幽冀假續綏  
集將軍樂陵太守屯厭次以續子乂為督護綏懷流散多歸附之後  
以孤危無援權附石勒勒以乂為督護既而段匹磾在薊遺書邀續  
俱歸晉其下諫曰今棄勒歸匹磾任子危矣續垂泣曰我出為國豈  
得顧子而為叛臣哉遂絕勒勒殺乂元帝以續為平原太守後復為  
勒所執不屈而死

右採錄  
晉書

北魏

李淑虎渤海人好學博聞有識度太和中為本國中正攝樂陵中正  
蓋郡佐也性清直有公平之譽

右採錄  
魏書

蘇淑字仲和武邑人熙平中除樂陵內史清心愛下有民譽後謝病

歸吏民老幼訴留者甚衆齊獻武追美清操詔賞穀帛當時稱為良  
二千石

採錄南北史

北齊

房豹字仲幹清河人體貌魁岸美丰儀釋褐開府參軍兼行臺郎中  
遷樂陵太守鎮以凝重哀矜貧弱階庭簡靜囹圄空虛郡治濱海水  
味多鹹苦豹命鑿一井得甘泉人謂政化所致

高攸樂陵太守為政謹嚴凡守令參佐往來雖難黍糧餉微事無不  
周知時號神明

樂陵自漢迄六朝俱郡治舊志載為太守者二十有七人為立  
傳者祇龔遂等六人茲僅載有傳者若重合令樂陵中正樂陵

內史三人亦依舊志載之

明

沙鵬宏治十三年由進士令樂陵飭容貌寡言笑人不敢干以私興賢育才庭無滯獄凡徭役催科莫不處置有方吏胥不得因緣為奸士民戴之

宋璉直隸清苑人宏治十三年由舉人任樂陵教諭耿介自持激揚士行教績卓然擢陝西道監察御史

許達字汝登河南固始人以進士令樂陵正德辛未劉七等為亂犯樂陵達督壯士張達連擊敗之擢兵備僉事守棣州及劉七等犯利津又率兵擊破之復追戰於海豐斬首數百級賊自是不敢入境論

樂陵縣志卷二

七

功轉江西副使宸濠反與孫燧同罵賊死

按舊志胡岳立許忠節公祠記略云崇禎甲申三月十九日李賊陷京師公廟肅然風起兩碑俱仆知公忠魂耿耿歷數百年而猶在云

王登庸文安人舉人萬厯間任樂陵令創修邑志十九年鉤盤河枯大加挑濬又教民樹藝相土宜棗遇民有過者計罪輕重量植棗樹以贖愆至今民受其賜

倪尚志直隸天津衛人萬厯間由舉人任樂陵知縣善政惠民仁聲載道歷五十餘年猶謳頌不置

馬經邦雲南蒙化人由舉人為樂陵令崇禎十年流寇猖獗人心騷

動經邦率士民協力守禦城賴以安歲大祲撫字多方人稱愷悌  
舊志自洪武迄崇禎凡官本境者皆臚列其姓名而為立傳者  
知縣則二十一人縣丞三人主簿二人典史三人教諭五人訓  
導三人右採錄者知縣五人教諭一人

國朝

郝獻明萬全右衛人由順治乙未進士令樂陵性淡泊勤政事錢糧  
羨餘以及臨德漕米擔頭陋例悉除之里書以荒作熟虛派地一百  
二十項獻明力為清正止存三十項民至今感其德

李時謙字吉友淮安山陽人順治辛丑進士康熙七年令樂陵果毅  
有為嘗修城東門樓以資捍禦甄陶士類多所成就蒞任三載擢湖

廣道監察御史上疏力陳康熙十六年前令履畝灑派之弊雖格於  
部議而邑民感戴弗諼云

陳師孔字願菴福建閩縣人康熙乙丑由鄉舉令樂陵公體貌清癯  
古氣岸然嘗遭耿逆之變不為屈赴官時正供外多雜稅民困之往  
往失業師孔捐俸墊供力白上官多所罷除嘗作自警語書牌於馬  
前云受一分枉法錢幽有鬼神明有憲作半點虧心事遠在兒孫近  
在身可想見其梗概矣

姜植鑲藍旗人康熙二十五年由奉天府廕生令樂陵八載凡雜項  
繁擾諸弊多所芟除民蒙其休

楊儉大興廩生康熙五十五年由教習令樂陵除莠民張五牛六牛

等人咸快之

張任字仁齋蓬萊人以兄倬為樂陵教諭卒於官任繼其缺數年不忍履學署恆假館以居性行淑均清介自持擢知縣累遷至河東運使

鄒璲四川人雍正間令樂陵時邑大水力請成災委查者多方阻駁璲請益力終得蠲賑

賈若瑚山西陽曲人貢生久歷學職於乾隆元年陞樂陵令嘗云吾居官惟欲化大事為小事化小事為無事蒞政二年清苦如寒士人稱長者

右採錄乾隆二十七年重修縣志為立傳者原十五人茲採錄

者僅八人

王謙益福建永春州人乾隆戊寅由進士令樂陵修邑乘建義學陶甄士類多所成就辛巳秋淫雨禾田盡萎謙益匹馬勘驗於泥淖中不辭勞復申求蠲緩民獲蘇時議濬馬頰河培高堤埝謙益兩牒上憲斬紓民力邑人至今感之

邵延曾順天大興人乾隆癸卯舉人嘉慶七年任樂陵知縣蒞任七載勤政愛民尤以尊禮名賢為主慕張中丞發董通判養性之為人皆再謁其墓文昌閣西偏舊有九賢祠又訪求賢士得潘體震張鏐增入為十一賢焉

宗元醇字筱棠河南魯山縣人道光間由進士令樂陵性仁慈理訟

事每答人以袖自蔽其面創建考院額其堂曰采珊堂文廟圯又倡修之假歸後仕至順天府尹

劉醇字果田直隸天津人道光末由進士令樂陵性寬和保正多奸猾前令催科率力比醇以仁慈馭之亦無敢玩先後宰樂陵累次均有劉寬雅量之稱水災多請蠲緩工草書人得其片紙如至寶

臧俊千字官虞諸城縣人咸豐間由舉人教諭樂陵以造就人才為急問業者門外屢常滿邑中科第多出其門居官儉約歲款出學租蠲緩之同治間捻匪圍城急俊千佐令區畫城賴以完蒞任既久時遊郊外與父老子弟勸農桑講孝弟雖婦人孺子俱呼為臧夫子年逾七旬捐貲倡修聖廟工竣始告歸

范許珍字聘席浙江天台縣人光緒間由舉人令樂陵性和易尤愛士戊子秋闈邑士齊集省垣公始奉檄即解橐仗助其寒苦者月試書院及交卸猶捐貲二千緡存息作賓興費自撰堂楹云嗜好幸無他入仕宦場中未改寒酸本色經營多不果愧兩三年內難副父母尊稱其愛民養士之心可見矣

乾隆二十七年以後官本境者不乏循良茲採錄者知縣四人  
訓導一人

按穀梁子有言民勤於力則工築鮮民勤於財則貢賦少民勤於食則百事廢牧令者親民之官首在勤求民隱而以清慎行之興一利而民不以為勞除一弊而民不以為刻民者可與圖